

Gratias Tibi ago, Vir Celeberrime, insignes pro munere Tuo Tentaminis luculenti de Opobalsamo, in quo tam splendide de Rege meo Ejusque in bonas Literas amore censes.

Ne, quaeso, dubites, me omni oblata occasione operam daturum, ut Tibi constet, quanti ego faciam illustre nomen Tuum et merita summa, quibus in Orbe erudito clares et immortalis fama clarebis. Si quid unquam erit penes me, quod Tibi acceptum fore judicabo, mihi credas, velim, ejus Te participem reddere mihi tam erit gratum, quam quod gratissimum. Vale.

Dabam Hafniæ die XXV. m. Maji, A. D. MDCCLXV.

(87) Per-Illustri ac Generosissimo
 Domino Carolo à Linné
 Equiti aurato, S. R. M. Sueciae Archiatro
 Celeberrimo, reliqua,
 S. P. D.
 J. H. E. C. de Bernstorff.

Redditæ mihi sunt Literæ Tuæ die XXIX mensis Januarii proximi ad me perscriptæ, praeclarum animi Tui in me affectum uberrime significantes, eoque mihi nomine quam acceptissimæ. Gratias Tibi ago, Vir Celeberrime, maximas, tot tantisque abs Te benevolentiae testimoniis cumulatus, easque referendi si mihi unquam occasio obtinget, me sane felicem existimabo. Pauca quippe sunt, quæ me majore voluptate afficere poterant. Quoties recordabor, meos qualescunque de literis et scientiis bene merendi conatus Tuo calculo probatos et à Te laudibus ornatos fuisse, non potero quin eas Tuæ in me Amicitiae soli gratus tribuam. Vehementer autem lætor, Te aliquo in loco posuisse pauca illa, quibus voluntatem in Te meam studiumque desiderii Tuis inserviendi declarare volui potius quam potui; Id quidem est quod magno mihi honori duco. Tibi Tuisque usibus, Vir Clarissime, aliquid impertiri, quod ad amplificandam et illustrandam rerum Naturæ, operum Creatoris summi, cogni-